

# BATAKURU PUULUSA HAA E BE ROOMU BEN

**1** <sup>1</sup>Immorde e an min Puulusa, nduu kurkaadu Iisaa Almasiihu on, noddaado wonugol \*sahaabaajo, wadaado feere fii yottingol Kibaaru Moyyo Alla on. <sup>2</sup>Hari Allaahu on fodiriino oo Kibaaru immorde e annabaabe ben e nder bindi seniidi din. <sup>3</sup>Tawi ko on Kibaaru sifii ko fii Biddo makko on: ka banje bandu ko e bolondaa Daawuuda o jibinaa, <sup>4</sup>ka banje \*Ruuhu Seniido on, immintineede makko e hakkunde maybe ben banginirii bawgal ko o \*Biddo Alla, dun ko Iisaa Almasiihu Joomi men on. <sup>5</sup>Ko kanko men hebiri moyere e sahaabankaaku fii ardagol yimbe e nder leyiyi din fow e innde makko fii gomdingol mo e doftagol mo. <sup>6</sup>Onon kadi hidon tawdaa e mabbe, onon bee be Alla noddi yo wonu be Iisaa Almasiihu on. <sup>7</sup>Onon wonbe Roomu ben fow, noddaabe wonugol be Alla yidi e jeyaabe Alla: yo buttu e moyere wonan on immorde e Alla, on Baabaajo men, e Iisaa Almasiihu Joomi on.

## Fii Yela Puulusa on Yahugol Roomu

<sup>8</sup>Mido jarnude taho on Alla an, immorde e Iisaa Almasiihu on, fii mon on fow, ko fii gomdinal mon ngal ko lollungal e aduna on fow. <sup>9</sup>Alla, on mo mi rewirta ruuhu an on e nder yottingol Kibaaru Moyyo Biddo makko on, ko seedee an wonde mido maandinde fii mon jnande woo ka toraaje an. <sup>10</sup>Awa kadi mido toraade Alla soono woo, si tawii ko faale makko hebugol feere no mi yaara ka mon jooni. <sup>11</sup>Ko fii mido faalaa yi'ude on fota fii hewtingol on dokkal goo iwrungal e Ruuhu Alla on fii no tabitiron, <sup>12</sup>maadun fii no wakkilindiriren ka mon, mo kala e men wakkilora gomdinal oya ngal.

<sup>13</sup> Mi faalaaka yo on ronku andude, yo musibbe an, wonde soono woo mi ebbay yahugol yi'a on, fii no mi sonitira battane moyye hakkunde mon, onon kadi, wano 6eya be wonaa Yahuudiyanke heddiibe non. Kono haa jooni mi hebaali feere. <sup>14</sup>Ko

fii no farlii mi andingol \*Gereekiyankeeben e leyyi dî finaa din, e faamuþe ben e njofoobe ben.<sup>15</sup> Ko dun wadi si mido faalaa yottingol e mon Kibaaru Moyyo on, onon wonbe Roomu ben kadi.

<sup>16</sup> Ko fii mi hersiraa Kibaaru Moyyo on, dun ko bawgal Alla fii kisiyee wonannde kala gomdindo, ko adii kon taho ko \*Yahuudiyankeeben, hikki don be wonaa Yahuudiyanke ben.<sup>17</sup> Ko dun wadi, peewal Alla ngal no banginireede Kibaaru Moyyo on, gila ka gomdinal fuddi haa ka ngal hatti, wano windori non: «Feewudo on wuuiray gomdinal ngal.»<sup>a</sup>

### Fii Tikkere Alla nden e hoore Yedduþe mo þen

<sup>18</sup> Tikkere Alla nden no bangi iwrude ka kammu e hoore kala junuubu e kala bone ko yimbe suudiraybe goonga on kuude mun bonde wadata.<sup>19</sup> Ko fii ko waawaa andeede e Alla kon no feejnani be kambe, bay Alla fejjinanii be dun.<sup>20</sup> Bay, ko yi'otaako kon e Alla, dun ko bawgal makko poomayankewal ngal e allankaaku makko ngun, kuude makko den no bangini dun fota gila ka fuddoode aduna. Be alaa lamitorgal.<sup>21</sup> Ko fii nde be andunoo Alla, be ronki mo mawninirde wa Alla, awa kadi be jarnaali mo, kono be majjiri haalaaji mehi, berde mabbe de alaa faamu den kadi yollii ka nder nibe.<sup>22</sup> E nder ko be mantorta ko be faamuþe kon, be laatii njofoobe.<sup>23</sup> Be lontiniri mangu Alla, mo maayataa on, mbaadijji lontiidi neddanke maayaydo e colli e kulle yaarooke koyde nay e kulle daasotoode.

<sup>24</sup> Ko dun wadi si Alla accidi be e himmeeji berde mabbe e angal laabal, fii no be hayfinira balli mabbe din kambe tigi.<sup>25</sup> Dun ko ben lontinirbe goonga Alla on fenaande, yanganiibe rewi ko tagaa kon, doo e be yanganaade rewa Tagudo on, on mo mantoore wonani haa poomaa. Aamiina!

---

<sup>a</sup>1.17 Hab. 2.4

<sup>26</sup> Ko dun si Alla accidi ɓe e himmeeji mabbe hersiniidi din. Ko fii rewbe mabbe ɓen lontinirii dewle mun den e kuude harmude. <sup>27</sup> Worbe ɓen kadi wano non, ɓe seli yiidugol e rewbe ɓen, hibe hubbani faaleeji hakkunde mabbe kambe worbe ɓen, hibe yiida hakkunde mabbe e mbalndi, hibe hettude njoddi handundi e majjere mabbe nden. <sup>28</sup> Bay ɓe sikkii moyyaa ka ɓe anda Alla, Alla accidi ɓe e ngun faamu boyliingu, fii wadugol piiji di haanaa. <sup>29</sup> Ko ɓe heewube nooneeji di feewaa e bonkiji e miile e bone e nawliigu e warugol e yeddondiral e kippugu e hunyeendi e baddi. <sup>30</sup> Ko ɓe no'ooɓe, anube Alla, yenkoobe. Ko ɓe mawnintiniibe e mantiibe e sincoobe ko boni e murtanbe mawbe mun, <sup>31</sup> ɓe aldaa e faamu, ɓe sellaa kongol, ɓe aldaa e giggol, ɓe aldaa e yurmeende. <sup>32</sup> Fii kala hibe andi yamiroore Alla feewunde nden ko wi'i kon wonde ɓen wadaybe din piiji ko fodduɓe e mayde, hibe wadude dun, hibe jabani kadi ɓen wonbe wadude dun.

### Fii Naawoore Alla Feewunde nden

**2** <sup>1</sup> An kadi non, oo feloowo, a maraa lamitorgal woo. Ko fii nde hida fela beya, haray hida fawude hoore maa naawoore an tigi. Ko fii an, wondo felude on, hida wadirde wa mabbe. <sup>2</sup> Hiden andi, ɓen warroobe non, Alla naawiray be goonga on. <sup>3</sup> An oo feloowo ɓen wadiroobe non, hara hida wadira non tigi, a sikku a daday naawoore Alla nden? <sup>4</sup> Kaa a yawiti ngaluoji moyyere makko nden e mujal makko ngal e yondinaare makko nden, e baawo andugol wonde moyyere Alla nden no poodude ma e tuubuubuyee?

<sup>5</sup> Kono sabu sattere maa fii nden e bernde maa yoorunde nden, hida mooba tikkere fii jalaande tikkere nden, dun ko fii jande feejugol naawoore Alla feewunde nden, <sup>6</sup> on Jonnitoyoowo mo kala njoddi kuude mun den. <sup>7</sup> Ngurndan poomayankejan\* dan wonanay ɣajniibe e wadugol ko moyyi, dabb'a darja on e teddungal e ngurndan dan lannataa dan, <sup>8</sup> kono wondube e haasidi ɓen, salii doftaade goonga on fii doftagol angal peewal ngal: tikkere e monee no maranaa

6e. <sup>9</sup> Satteende e annde wonanii kala wadoowo ko boni, ko adii kon ko Yahuudiyankeebé ben, hikki don 6e wonaa Yahuudiyanke ben. <sup>10</sup> Kono darja e teddungal e buttu wonanii kala on wadoowo ko moyýí, ko adii kon ko Yahuudiyankeebé ben, hikki don 6e wonaa Yahuudiyanke ben. <sup>11</sup> Ko fii gidaale alaa ka Alla.

<sup>12</sup> Kala ben wadubé junuubu e baawo andugol Sariya on, mulay e baawo Sariya on. E kala non kadi wadudo junuubu e hoore andugol Sariya on, jaawirte Sariya on. <sup>13</sup> Ko dun wadi, hinaa hedotoobe Sariya on woni feewube yeeso Alla, kono ko doftotoobe Sariya on jogortee feewube. <sup>14</sup> Si tawii non 6e wonaa Yahuudiyanke ben, ben 6e maraa Sariya, wadii ko Sariya on wi'i kon tigi, dun ko ben 6e maraa Sariya, haray hibe mari sariya fii mabbe kambe tigi. <sup>15</sup> Dun haray 6e banginii wonde kuugal Sariya on no windii ka berde mabbe, fondo mabbe ngon no seeditaade dun, mijoiji mabbe din kadi no felude 6e e saa'i goo, e saa'i goo no dandude 6e. <sup>16</sup> Ko dun fow feenoyta nande Alla jaawoya mijoiji berde yimbe suudiidi din, o naawiroya di Iisaa Almasiihu on, wano Kibaaru Moyýo mo mi yottini on holliri non.

### Fii Yahuudiyankeebé ben e Sariya on

<sup>17</sup> An oo wi'itiido Yahuudiyanke, hoolordo Sariya on, wondo mantorde Alla, <sup>18</sup> andudo faale makko on, waawudo sendindirde ko buri moyýude kon, bay ko a jangirdo Sariya on, <sup>19</sup> an oo hooliido wonay ardotoodo bumbe, hoolii kadi wonanay ben wonbe ka niwre ndaygu, <sup>20</sup> andinoowo ben 6e alaa faamu, karamokoojo faybe, bay hida mari gandal timmungal e goonga selludo ka nder Sariya: <sup>21</sup> awa an, oo wondo jannude beya, e hara a alaa jannitaade an tigi? An, oo waajotoodo wota wujje, hinaa hida wujjude? <sup>22</sup> An, oo wondo wi'ude wota jeene, hinaa hida jeenude? An, oo ajudo sanamu, hinaa hida wujjude di, huutoraa?

<sup>23</sup> An, oo darjinordo Sariya on, hinaa hida hayfinirde Alla bonnugol Sariya on?

<sup>24</sup>Ko fii no windii: «Sabu mon innde Alla nden no hoyneede e hakkunde 6e wonaa Yahuudiyanke 6en.»<sup>b</sup>

<sup>25</sup>No fellitaa wonde \*sunninegol no hitti, si tawii a huutorii Sariya on, kono si a bonnii Sariya on, haray ko sunninadaa kon wonii meere. <sup>26</sup>Si tawii non mo sunninaaka on doftike yamirooje Sariya on, hara angal sunninelgol makko ngol jabirtaake wa sunninaado? <sup>27</sup>Awa, on neddo mo sunninaaka e bandu, timmindo Sariya on, jaawete an oo mo doftaaki Sariya on, fii kala hida wondi e bindi din e sunninannde nden. <sup>28</sup>Yahuudiyankaagal wonaa ka kene, sunninannde kadi hinaa feejunde e bandu nden. <sup>29</sup>Kono Yahuudiyankeeojo, ko wondo dun ka nder. Sunninannde haqiqaaare nden ko nde ka bernde, yaadunde e Ruuhu Allaahu on, hara hinaa yaadunde e bindi nden. Mantoore sifa on Yahuudiyankeeojo wonaa e yimbe 6en iwrata, kono ko e Alla.

### Fii Angal Peewal Yimbe 6en

**3** <sup>1</sup>Ko bural hongal Yahuudiyanke mari? E ko hondun woni nafa \*sunninegol? <sup>2</sup>No mari nafa e di fow. Ko adii kon, daaluyeeji Alla din ko Yahuudiyankeeben halfinaa. <sup>3</sup>E ko hondun si wobbe e mabbe wonaali sella-findeebe? E hara ngal angal sella-finneyaagal mabbe duytay godsdun e sella-finneyaagal Alla ngal?

<sup>4</sup>Pellet hinaa non! Hay si yimbe 6en fow ko fenoobe, Alla kan ko goongaajo, wano windori non wonde: «Peewal maa ngal no feejira kongudi maa din, nde jaawadaa woo wonaa fooludo.»<sup>c</sup>

<sup>5</sup>Si tawii non angal peewal men ngal feejinii wonde Alla ko feewudo, haray ko hondun wi'eten? Kere si Alla tippinii tikkere makko nden, haray hinaa o Feewudo? (Dun ko haala neddanke non!) <sup>6</sup>Pellet hinaa non! Si hinaa dun, ko honno Alla jaawirta aduna on? <sup>7</sup>E si tawii fenaande an nden no burtude 6anginde

---

<sup>b</sup>2.24 Isa. 52.5 e Haz. 36.22

<sup>c</sup>3.4 Zab. 51.6

goonga Alla on fii darja makko on, haray ko fii hondun min tigi mi naawirtee wa junuubankeejo haa jooni? <sup>8</sup> Awa ko hondun hadi wi'en, wano aybinoobe goo wi'irta wonde hiden wi'a: «Waden ko boni, fii ko moyýí yo yaltu.»? Donkineede 6en yimþe ko ko feewi!

### Fii no Fow Woniri e nder Junuubi

<sup>9</sup> Awa, enen Yahuudiyankeebé, ko hondun furden beya? Hay fus! Ko fii en banginii wonde kala Yahuudiyankeebé e mo wonaa Yahuudiyanke no e nder junuubu, <sup>10</sup> wano windori non:

«Feewudo alaa, hay e gooto non!

<sup>11</sup> Hay gooto alaa faamu,

hay gooto alaa dabbude Alla.

<sup>12</sup> Fow ko huccube Alla,

awa kadi be fow ko be boyliibe,

hay gooto alaa wondo wadude ko moyýí,

hinaa non hay e gooto!

<sup>13</sup> Konondi mabþe din ko genaale udditiide,

hiþe huutora dende mabþe den fii janfagol,

tuutaade toni mabþe din ko tooke mboddi.

<sup>14</sup> Kundule mabþe den no heewi kuddi e hahhannde,

<sup>15</sup> koyde mabþe den no hawjani hibbugol yiyan,

<sup>16</sup> yeebaare e tampere no ka date mabþe.

<sup>17</sup> Be andaali datal buttu ngal,

<sup>18</sup> awa kadi kulol Alla alaa e gite mabþe.»<sup>d</sup>

<sup>19</sup> Hiden andi wonde ko Sariya on wi'i kon fow ko wonþe e ley Sariya on wi'aa, fii no kala hunduko ombiree, e no Alla naawira yimþe aduna on fow. <sup>20</sup> Ko fii hay

---

<sup>d</sup>3.10-18 Zab. 5.9, 10.7, 14.1-3, 36.2, 53.2-4, 140.3, e Isa. 59.7-8

gooto jogortaake feewudo yeeso Alla fii ko o doftii Sariya on kon, ko fii ko immorde e Sariya on junuubu andori.

### Fii Peewal Immorde e Gomdinal

<sup>21</sup> Kono jooni, Alla fejjinii ko honno goddo waawetee jogoreede feewudo yeeso Alla e baawo Sariya on, wano Sariya on e annabaabe ben seeditori non. <sup>22</sup> Alla jogoray yimbe ben feewube sabu ko be gomdini Iisaa Almasiihu on kon, dun ko gomdinbe ben fow. Ko fii sendondiral alaa: <sup>23</sup> fow wadii junuubu, be waawataa hewtude mangu Alla ngun. <sup>24</sup> Awa ko tippude e dokkal moyyuki makko kin be jogoraa feewube rewrude e cottudi wondi e Iisaa Almasiihu on ndin, <sup>25</sup> on mo Alla toddii wonugol sadaka fii, rewrude e yiy'an makko dan, no gomdinbe mo ben hebira yaafuyee junuubaaji. Alla wadi dun fii bingingol peewal mun ngal, ko fii o donkinaali bee wadunoobe junuubi feyyunoodi din fewndo mujal makko ngal. <sup>26</sup> O faalaama binginde peewal makko ngal e oo saa'i fewndiido, dun fow ko fii no andiree ko o Feewudo, o jogitora on gomdindo Iisaa wa feewudo.

<sup>27</sup> Ko dalil hondun non mantortee? Dalil woo alaa! Maa ko sabu hondun? Hara ko kuude den? Oo'o, kono ko gomdinal ngal. <sup>28</sup> Ko fii hidien wi'a wonde ko sabu gomdinal ngal neddo jogoraa feewudo, e baawo doftagol Sariya on. <sup>29</sup> Kaa hara Alla ko Alla Yahuudiyankeeben tun? E hinaa o Alla be wonaa Yahuudiyanke ben kadi? Hiiyii, ko o Alla be wonaa Yahuudiyanke ben kadi! <sup>30</sup> Bay ko Alla gooto woni jogordo sunninaabe ben feewube sabu gomdinal mabbe ngal, o jogora be sunninaaka ben kadi feewube sabu gomdinal mun ngal. <sup>31</sup> E hara dun no firi wonde en bonnitirii Sariya on gomdinal ngal? Pellet wonaa non! Ka liddu dun, hidien tambitaade Sariya on!

**Misal Yettaangal e Ibraahiima**

**4** <sup>1</sup>Awa ko hondun wi'eten fii Ibraahiima, oo maamiraawo amen iwrude ka yiyan?  
**Ko hondun o hebi?** <sup>2</sup>Si tawno ko sabu kuude den Ibraahiima jogoranoo feewudo, harayno himo mari feere mantagol. Kono hinaa non woniri yeeso Alla! <sup>3</sup>Ko hondun bindi din wi'i e dun? «Ibraahiima gomdini Alla, ngal gomdinal makko jogoranaa mo peewal.»<sup>d4</sup> E hin-le, on mo golli, njoddi makko ndin jogitoranaaka mo wa dokkal, kono ko ko haani. <sup>5</sup>On mo gollaali non, kono gomdini Alla on Jogoroowo be feewaa ben feewube, haray gomdinal makko ngal no jogoranaa mo peewal. <sup>6</sup>Daawuuda kadi no haali fii maloore neddo mo Allaahu on jogitori feewudo e baawo kuugal:

<sup>7</sup> «Maloore wonanii ben be bonkiji mun din yaafaa,  
 be tawata junuubaaji mun din montaama.

<sup>8</sup> Maloore wonanii on neddo,  
 mo Joomiraado on jogoraali junuubu mun.»<sup>e</sup>

<sup>9</sup>E hara nden maloore ko fii sunninaabe ben tun, kaa ko fii be sunninaaka ben kadi? Ko fii hidan wi'a: «Ibraahiima gomdini Alla, ngal gomdinal makko jogoranaa mo peewal.»<sup>10</sup> Ko honno o wa'unoo kanko Ibraahiima fewndo ngal jabanaa mo? Hari o teddinaama, kaa o teddinaaka? Hari o teddinaaka taho, ko mo o teddinaaka wonnood <sup>11</sup>fewndo o hendii maande \*sunninegol ngol, wa battatere peewal ngal o hebiri gomdinal ngal, fewndo ko o teddinanooka. Ko non o woniri ben kala gomdindo, hay be sunninanooka ben, fii no be jogoree feewube. <sup>12</sup>O laatii kadi ben sunninaabe ben, hinaa non sunninaabe ben tun, kono kadi ko o ben ben jokkube laawi gomdinal ngal kanko ben men Ibraahiima o hebunoo ngal wa fewndo ko o teddinanooka taho.

---

<sup>d</sup>4.3 Fud. 15.6

<sup>e</sup>4.8 Zab. 32.1-2

<sup>13</sup> Ko dun wadi, hinaa tippude e Sariya on Ibraahiima e jurriya mun on fodiraa ronugol aduna on, kono ko tippude e peewal iwrungal e gomdinal ngal. <sup>14</sup> Si tawno ko tippude e Sariya on ronirten, harayno gomdinal ngal ko fus, awa kadi harayno fodaari ndin firtaama. <sup>15</sup> Ko fii Sariya on ko tikkere rimata. Ka Sariya on non alaa don, haray bonnugol Sariya on alaa.

<sup>16</sup> Awa, ko dun wadi ko gomdinal ngal fodaari ndin ronirtee, fii no laatora dokkal moyyere, fii no jurriya on fow hendora fodaari ndin, wonaa non jogiibe Sariya on tun, kono ko hay jogiibe gomdinal Ibraahiima maama men ngal en fow, <sup>17</sup> wano windori non: «Mi wadii ma maamaajo leyýí duududi.»<sup>f</sup> Ko o maama men en fow yeeso Alla, on mo o gomdini, on Yedoowo maybe 6en ngurndan, on Woodinoowo ko woodanooka. <sup>18</sup> O tanyinii ka tama'u alaa, o gomdini. Ko nii o woniri maamaajo leyýí duududi, wano daaliranoo non: «Ko nii jurriya maa on duudiroyta!»<sup>g</sup><sup>19</sup> E baawo lo'angol gomdinal ngal, o tawi bandu makko ndun fayda ko mayndu, ko fii hari moggo o teeminii, awa kadi hari dimdimol Saarata ngol ko mayngol. <sup>20</sup> Awa o hutitoraali fodaari Alla ndin sabu angal gomdinal, kono o wonti tiida-gomdinaljo, o mawnini Alla. <sup>21</sup> O felliti wonde Alla no mari bawgal hunnugol ko o fodi kon. <sup>22</sup> Ko dun wadi si gomdinal makko ngal jogoranaa mo peewal. <sup>23</sup> Hinaa fii makko kanko tun dun windiraa, <sup>24</sup> kono ko fii men, enen kadi, enen bee jogorteebe feewube, gomdinbe on Immintindo Joomi men on Iisaa e hakkunde maybe 6en, <sup>25</sup> ittaado sadaka fii bonnereeji men din, e immintinaado fii yo en jogoree wa feewube.

### Fii Humondiral e Alla

**5** <sup>1</sup> Nde tawnoo en jogoraama feewube sabu gomdinal men ngal, hidén mari buttu e Alla rewruđe e Iisaa Almasiihu Joomi men on. <sup>2</sup> Ko sabu makko hebirden, iwrude e

---

<sup>f</sup>4.17 Fud. 17.5

<sup>g</sup>4.18 Fud. 15.5

gomdinal ngal, naatirgal e oo sulfu, mo wonden e mun, tabituden. Hiden mantorde on tama'u mo marden fii mangural Alla ngal.<sup>3</sup> Ko beyditii e dun, hiden mantorde hay e nder tampereeji din, e hoore andugol wonde tampereeji din rimay ɻajnjagol,<sup>4</sup> ɻajnjagol ngol kadi ardo haa e jikku timmudo, jikku timmudo on kadi adda tama'u.<sup>5</sup> E hin-le tama'u on hersinoytaa, ko fii Alla juuriri giggol makko ngol ka berde men \*Ruuhu Seniido mo yedaden on.

<sup>6</sup> Ko fii fewndo tawnoo en maraa doole, e saa'i toddaado on \*Almasiihu on mayno fii be rewataa Alla ben.<sup>7</sup> Ko karahan goddo jabirta maayande aaden feewudo, kono no gasa ka goddo wakkiloo maayangol neddo moyʃyo.<sup>8</sup> Kono e nder dun, Alla banginii giggol mun ngol fii men: wa fewndo wonnoden junuubankeebe, Iisaa Almasiihu on mayno fii men.

<sup>9</sup> Jooni, bay en jogoraama feewube sabu yiyan makko dan, haray ko honno ronkirten dandireede tikkere nden sabu makko?<sup>10</sup> Si tawii fewndo wonnoden aybe makko kanko Alla, o moyʃintinirii hakkunde men e makko sabu mayde Biððo makko on, haray ko haa honto non dandirteden ngurndan makko dan, enen moyʃintinidaabe e makko kanko Alla ben!<sup>11</sup> Ko beyditii e dun, hiden mantorde Alla sabu Iisaa Almasiihu Joomi men on, on wondo sabu moyʃintingol hakkunde men e Alla.

### Fii Eþþindirgol Aadama e Iisaa Almasiihu on

<sup>12</sup> Ko dun wadi, ko wano non, sabu aaden gooto, junuubu naatiri e aduna on, e sabu on junuubu kadi mayde nden ari, ko wano non kadi mayde nden rewiri e hoore yimbe ben fow, ko fii fow wadii junuubu.<sup>13</sup> Ko fii, haa fewndo addegol Sariya on, hari junuubu on no e nder aduna on, kono junuubu ndaareetaake si sariya alaa.<sup>14</sup> Kono mayde nden laamii gila e \*Aadama haa e Muusaa, hay e hoore be wadaano junuubu ben wa bonnere Aadama nden, on mo tawata ko mbaadi Aroyoowo on.<sup>15</sup> Kono bonnere Aadama nden e dokkal Alla ngal wonaa gootun. Si

tawii buy maayii sabu bonnere aaden gooto, dun ko Aadama, haray ko haa honto non moyyere Alla nden, e dokkal iwrungal e moyyere on aaden gooto, dun ko Iisaa Almasiihu on, layirta haa heewa e hoore duudube! <sup>16</sup> Ko wano non, battane junuubu aaden gooto e dokkal Alla ngal wonaa gootun. Ko fii jaawoore nden bawto junuubu gooto ko addi ko donkineede, e hin-le dokkal ngal bawto bonnereeji duudufi ko addi ko jogoreede wa feewube. <sup>17</sup> Si tawii, sabu bonnere aaden gooto, dun ko Aadama, mayde nden laamorii immorde e makko kanko tun, haray ko haa honto hebube moyyere heewunde e dokkal peewal ben laamotoo ka ngurndan, sabu oo gooto, dun ko Iisaa Almasiihu on! <sup>18</sup> Ko dun wadi, si tawii donkinande bonnere aaden gooto hewtii yimbe ben fow, ko wano non kadi, ko sabu kuugal feewungal gootal, peewal yedayngal ngurndan ngal hewtiri yimbe ben fow. <sup>19</sup> Nde tawnoo duudube laatike junuubankeebe sabu angal doftaare aaden gooto, dun ko Aadama, ko wano non kadi duudube laatortoo feewube sabu doftaare aaden gooto, dun ko Iisaa Almasiihu on. <sup>20</sup> E hin-le ko Sariya on arani, ko fii yo bonnereeji din beydo. Kono ka junuubu on beydii don, ko don sulfu on beydii beydaadee. <sup>21</sup> Ko wano junuubu on banginiri bawgal mun mayde non, ko wano non kadi sulfu Alla on banginiri bawgal mun ngal peewal nawrayngal e \*ngurndan poomayankejan dan immorde e Iisaa Almasiihu Joomi men on.

### Fii Maayugol e telen-ma Junuubu, Wuurana Alla e Almasiihu on

**6** <sup>1</sup> Awa ko hondun wi'eten? En duumoto e wadugol junuubu on fii yo sulfu on beydo? <sup>2</sup> Pellet hinaa non! Enen, bee maybe e telen-ma junuubu, ko honno non w提醒ten e nder junuubu kadi? <sup>3</sup> E on andaa wonde, enen bee \*lootaabe maande kisiyee e nder humondiral e Iisaa Almasiihu on fow, ko e mayde makko nden tawdad? <sup>4</sup> Awa, en surridaama e makko ka nder mayde rewruude e looteede maande kisiyee nden, fii, wano \*Almasiihu on imminiraa non e hakkunde maybe ben rewruude e mangu Baabaajo on, enen kadi, yo en wuuru ngurndan kesan. <sup>5</sup> Ko

dun wadi, si en yubbondirii e makko ka mayde makko, pellet en woniray kadi wano non ka immintineede makko.<sup>6</sup> Ko fii hidēn andi ngurndan men kiddan dan fempidaama e makko, fii no ndun bandu junuubankeeru muliree, fii wota en laato hande kadi maccube junuubu.<sup>7</sup> Ko fii kala maydo fuutike bawgal junuubu.<sup>8</sup> Si tawii en maayidii e Almasiihu on, haray hidēn gomdini wonde en wuuriday e makko.<sup>9</sup> Ko fii hidēn andi wonde Almasiihu on immitike e hakkunde maybe ben, o maayataa hande kadi, mayde nden maraa doole hande kadi e hoore makko.

<sup>10</sup> Nden mayde nde o maayi, ko e telen-ma junuubu o maayi, nde wootere ko yoni haa poomaa. Jooni non himo wuuri, ko Alla o wuurani.<sup>11</sup> Onon kadi wano non, jogoree hoore mon wa maybe e telen-ma junuubu, e wa wuuranbe Alla e nder humondiral e Iisaa Almasiihu on.

<sup>12</sup> Awa, wota junuubu laamo balli mon maayaydi din, e wota on dofto himmeeji majji din.<sup>13</sup> Wota on weebitan tere mon den junuubu, wa aala fii angal peewal, kono wattee hoore mon onon tigi e Alla, wa wuuruþe iwþe e mayde, sakkanodon Alla tere mon den wa aalaaji fii peewal ngal.<sup>14</sup> Dun, junuubu foolataa on, ko fii hinaa e ley Sariya on wondon, kono ko e ley sulfu on.

### Fii Maccube Peewal ngal

<sup>15</sup> Jooni non, ko honno? E hara en jokkay wadugol junuubu, bay hinaa e ley Sariya on wonden, kono ko e ley sulfu Alla on? Pellet waawataa wonde!<sup>16</sup> E on andaa, si on wadii hoore mon maccudo goddo fii doftagol mo, haray on wonii maccudo on mo doftidon? Ko si on wonu maccube junuubu nawroowo e mayde, maa si on wonu maccube doftaare nawraynde e peewal.<sup>17</sup> Kono ko yettude Alla, bawto on wonude maccube junuubu on, on doftorii bernde noone jannde nde hewtinadon nden.<sup>18</sup> Bay on jattinaama junuubu on, on wontii maccube peewal ngal.<sup>19</sup> (Ko wano neddanke'en nii mi woni yewtirde, sabu lo'ere balli mon din.) Wano wadirnodon tere mon den wa kurkantooode angal laabal e angal peewal, fii

sakkitorogol ka angal peewal, jooni kadi wadiree wano non tere mon den wa kurkantooode peewal ngal fii sakkitorogol laabal ngal.

<sup>20</sup>Ko fii, fewndo wonnodon maccube junuubu, hari on alaa kurkanaade peewal ngal. <sup>21</sup>Ko hondun hebunodon e den kuude de wadunodon, den de tawata hidon hersiri jooni? Ko fii sakkitoode majje on ko mayde. <sup>22</sup>Jooni non, onon jattinaabe junuubu ben, ko on maccube Alla, ko mardon tono ko laabal, sakkitoode nden kadi ko \*ngurndan poomayankejan. <sup>23</sup>Ko fii, njoddi junuubu ko mayde, kono dokkal Alla ngal ko ngurndan poomayankejan e nder humondiral e Iisaa Almasiihu Joomi men on.

### Misal Yettaangal e Dewgal

**7**<sup>1</sup>E on andaa yo musibbe wonde Sariya on ardoto goddo fannin himo wuuri? (Mido yewtude on wano mi yewtirta yimbe andube Sariya on.) <sup>2</sup>Ko sariya on humindiri debbo yettaado e moodi mun, yeru on no wuuri. Kono si moodi makko maayii, haray on debbo seedii e on sariya humindirnoodo mo e moodi makko. <sup>3</sup>Si tawii non e nder ngurndan moodi makko, o wonii beyngu gorko goo, haray o wontii jeenoowo. Kono si tawii moodibbo on maayii, haray o sendaama e sariya on. Dun, si goddo goo yettii mo, haray hinaa o jeenoowo.

<sup>4</sup>Onon kadi ko wano non, yo musibbe an, on maayii e telen-ma Sariya on wondude e bandu Iisaa Almasiihu on, fii no jeyiredon e goddo goo, on immintinaado e hakkunde maybe ben, fii no wadiren kuude welayde Alla. <sup>5</sup>Ko fii, fewndo jokkunoden mbeleede bandu men ndun, hari faaleeji bondi yaadudi e junuubu immorde e Sariya on no ardotonoo tere men den, fawa en kadi kuude nawrayde e mayde. <sup>6</sup>Kono jooni, en seedii e Sariya on, ko fii en maayii e telen-ma kon ko wadunoo en maccube. Ko dun wadi, jooni hiden kurkorande Alla noone keso tippude e Ruuhu makko on, hara hinaa e oya noone kiddo mo Sariya.

## Hakkunde Sariya on e Junuubu

<sup>7</sup> Awa ko hondun wi'eten jooni: Sariya on ko junuubu? Pellet hinaa dun! Kono ko sabu Sariya on mi andiri junuubu. Ko fii mi andataano ko woni himme si Sariya on wi'aano «wota mo himma!»<sup>8</sup> Onsay junuubu on baarori yamiroore nden, o wadi e an kala noone himme. Ko fii, si Sariya on araano, hanno junuubu on ko maydo. <sup>9</sup> E telen-ma an min, si Sariya on alaano, hanno mido wuuri. Kono bay yamiroore nden arii, junuubu on wuuri, min mi maayi. <sup>10</sup> Onsay yamiroore nawraynde e ngurndan nden nawrimmi ka mayde. <sup>11</sup> Ko fii junuubu on daynimmi baarori yamiroore nden, warimmi. <sup>12</sup> Dun non, Sariya on ko \*seniido, yamiroore nden kadi ko seniinde, feewunde moyyere. <sup>13</sup> Awa hara ko moyyí kon wonanii lan mayde? Pellet oo'o! Kono ko junuubu on, fii yo o feeju junuubu, o wadirii e an mayde rewrude e ko moyyí kon, fii yo junuubu on feenir no laabiri poy junuubu sabu yamiroore nden.

<sup>14</sup> E hoore dun, hidén andi wonde Sariya on ko e Alla iwri, kono min, ko mi neddanke maccinaniido junuubu. <sup>15</sup> Ko fii mi faamaa ko mi woni wadude kon. Ko mi yidi kon kadi mi alaa wadude dun, kono ko ko mi aji kon mi woni wadude. <sup>16</sup> Si tawii mido wadude ko mi faalaaka kon, haray mido jabi wonde Sariya on ko moyyo. <sup>17</sup> Jooni non, hinaa min han kadi woni wadude dun, kono ko junuubu wondo e an on. <sup>18</sup> Ko fii mido andi wonde ko moyyí kon alaa e an, e maanaa ka bandu an. Ko fii min tigi mido wondi e faale wadugol ko moyyí, kono mi alaa wadude dun. <sup>19</sup> Mi alaa wadude moyyere nde mi faalaa nden, kono mido wadude bone mo mi faalaaka on. <sup>20</sup> Si tawii mido wadude ko mi faalaaka, haray hinaa min tigi hande kadi woni wadude dun, kono ko junuubu wondo e an on.

<sup>21</sup> Awa e hino sariya mo mi tawi on: tuma mi faalaa wadude ko moyyí woo, haray bone on no e an. <sup>22</sup> Ko fii Sariya Alla on no welammi ka bernde, <sup>23</sup> kono mido yi'ude ka tere an sariya goo, wondo dartaade sariya faamu an ngun, wondo lan e

wattude maccudo sariya junuubu, wondo e tere an den.<sup>24</sup> Min e tampere an! Hara ko hombo jattintammi e nduu bandu maayooru?<sup>25</sup> Ko yettude Alla, immorde e Iisaa Almasiihu Joomi men on! Ko dun wadi, si ka bernde an ko mi maccudo Sariya Alla on, fii kala ka bandu an ko mi maccudo sariya junuubu on.

### Fii Wuurirgol Ruuhu Allaahu on

**8**<sup>1</sup>Jooni donkinande woo alanaa ben humondirbe e Iisaa Almasiihu on.<sup>2</sup>Ko fii sariya Ruuhu ngurndan wondo e Iisaa Almasiihu on jattinii lan sariya junuubu e mayde on.<sup>3</sup>Ko fii Alla timminii ko Sariya on ronki kon, bay lo'ere neddanke nden mehindinii mo. Alla muncii bawgal junuubu on ka bandu e nder addirgol Biddo makko on bandu nanditayndu e junuubankeeru neddanke ndun.<sup>4</sup>Alla wadiri dun fii no peewal Sariya on timmira e men, enen wonbe jokkude Ruuhu Allaahu on, hara hinaa e mbeleede bandu.

<sup>5</sup>Ko dun wadi, wuuirirbe mbeleede bandu ben ko fii mayru mijiotoo, kono wuuirirbe Ruuhu Allaahu on no mijiwoo fii faale Ruuhu Allaahu on.<sup>6</sup>Jokkugol mbeleede bandu ko mayde, jokkugol non faaleeji Ruuhu Allaahu on ko ngurndan e buttu.<sup>7</sup>Ko fii mbeleede bandu no api Alla, bay bandu ndun yankinantaako Sariya Alla on, ko bay non ndu waawataa!<sup>8</sup>Ko fii wonbe e ley mbeleede bandu ndun waawataa welude Alla.

<sup>9</sup>Onon non, on alaa e ley mbeleede bandu han kadi, kono ko e ley faale Ruuhu on, bay Ruuhu Allaahu on no e mon. Ko fii on mo Ruuhu \*Almasiihu on alaa e mun, haray hinaa mo makko.<sup>10</sup>Si tawii Almasiihu on no e mon, haray bandu ndun maayii sabu junuubu on, kono haray ruuhu on no wuuri sabu peewal ngal.<sup>11</sup>E si tawii Ruuhu makko kanko Immintindo Iisaa e hakkunde maybe ben no e mon, haray on Immintindo Iisaa Almasiihu on e hakkunde maybe ben yeday balli mon mayoogi din ngurndan immorde e Ruuhu makko Wondo e mon on.

<sup>12</sup>Dun haray, yo musibbe, no woodi ko fawii en, hara hinaa wuuringol mbeleede bandu. <sup>13</sup>Si tawii ko mbeleede bandu wuurdon, on maayay. Kono si tawii ko Ruuhu Allaahu on warirdon mbeleede bandu den, on wuurray. <sup>14</sup>Ko fii kala be Ruuhu Alla on ardii, ko bibbe Alla. <sup>15</sup>Awa Ruuhu mo hebudon on hinaa ruuhu maccangaaku fii wonugol fahin e nder kulol, kono ko Ruuhu Wadudo on bibbe Alla. Immorde e makko kanko Ruuhu on en ewnoto Alla «Abba!», dun ko «Baaba!»<sup>16</sup>Ruuhu Allaahu on tigi no seeditanaade ruuhu men on wonde ko en bibbe Alla. <sup>17</sup>Ko dun wadi, si tawii ko en bibbe makko, haray kadi ko en ronoobe mo kanko Alla, ronidoobe e Almasiihu on, si tawii e nder haqiqiqa hidén tamplitude e makko fii no tawireden e mangural makko ngal.

### Fii Mangu Aroyoowu ngun

<sup>18</sup>Mido felliti tampereeji oo saa'i fewndiido foddaa ebbindireede e mangu aroyoowu fejninanoyteengu en ngun. <sup>19</sup>Awa kadi tageefo ngon no habbori no tiidiri fii fejninede bibbe Alla ben. <sup>20</sup>Ko fii tageefo ngon ko e ley bitteende wadaa, hinaa tippude e yidi maggo, kono ko tippude e yidi Wadudo ngo e ley bitteende on, e hoore tanyinagol wonde <sup>21</sup>ngon tageefo tigi jattinte maccangaaku mayde e nolugol, ngo heba gebal ka ndimu bibbe Alla darjinngu ngun. <sup>22</sup>Ko fii hidén andi tageefo ngon fow no woytaade tampere haa hande wa muuseendi yata. <sup>23</sup>Ko beyditii e dun, enen kadi, bee adiibe hendaade Ruuhu Allaahu on, hidén woytaade ka berde men e nder ko habbiden haa Alla wada en bibbe makko, o sotta balli men din. <sup>24</sup>Ko fii ko e nder ndee tanyinaare dandaden. E hin-le si en yi'ii ko tanyiniden kon, haray dun wonaa tama'u hande kadi. E hara ko hombo tanyinortoo ko yi'i kon? <sup>25</sup>Kono si hidén tanyinii ko en yi'aali, haray hidén habbori dun yajnaare.

<sup>26</sup>Ko wano non kadi Ruuhu Allaahu on wallitorta en tuma lo'uden. Ko fii en andaa ko haanuden toraade Alla e nder torndeeji men din, kono on Ruuhu tigi

faaboto en e fee woytaangooji di waawotaako sifaade.<sup>27</sup> Ko fii Linoowo berde on no andi ko hondun woni mijo Ruuhu mun on, bay ko e yidi Alla, on Ruuhu fattoranta gomdinbe ben.

### Fii Burbe Foolude ben

<sup>28</sup> Hiden andi wonde piiji din fow no yaadude fii moyyere ben yidube Alla, noddiraabe sabu ebboore makko nden.<sup>29</sup> Ko fii, ko ben be o andunoo, ko ben o muuyani nandugol e mbaadi Biddo makko on, fii no on Biddo wonira Afo e hakkunde musibbe duudube.<sup>30</sup> Ben be o muuyannoo, o noddi be. Ben be o noddi, o jogori be kadi feewube. Ben be o jogori feewube non, o darjini be kadi.

<sup>31</sup> Ko hondun non wi'eten e dun? Si tawii Alla no wonani en, haray ko hombo dartotoo en?<sup>32</sup> On mo salanaaki en Biddo mun Bajjo on, kono o itti mo sadaka fii men en fow, ko honno o ronkirta en okkirde piiji din fow wondude e Biddo on, sabu moyyere makko nden!<sup>33</sup> Ko hombo toonata subaabe Alla ben? Hay gooto, bay ko Alla woni Jogoroowo wa feewudo.<sup>34</sup> Ko hombo donkinta be? Hay gooto, bay ko Iisaa Almasiihu on woni maayunoodo on, e hoore dun o immintinaama, himo ka sengo naamo Alla, himo tefande en.<sup>35</sup> Ko hombo sendindirta en e giggol Almasiihu on? Hara ko tampereeji din, kaa ko annde nden, kaa ko jokkereeji din, kaa ko heege ngen, kaa ko kolngal ngal,<sup>h</sup> kaa ko masiibo ngon, kaa ko kaafa kan?

<sup>36</sup> Wano windori non:

«Nallal ngal fow meden weebitanii mayde fii maa,  
men jogoree wa baali hirseteedil!»<sup>i</sup>

<sup>37</sup> Kono e nder dun fow, ko en foolube, hidem buri foolube kadi, sabu Yidudo en on.<sup>38</sup> Ko fii mido felliti, hinaa mayde nden, hinaa ngurndan dan, hinaa malaa'ikaabe ben, hinaa mbawdiji din, hinaa ko fewndii kon, hinaa ko aroyta

---

<sup>h</sup>8.35 Maa: «kolndan dan».

<sup>i</sup>8.36 Zab. 44.23

kon, hinaa doole ñen,<sup>39</sup> hinaa tagoore nden ka dow, hinaa tagoore nden ka ley,  
hinaa tagu goo kadi woo waawata en sendude e giggol Alla wongol e Iisaa  
Almasiihu Joomi men on!

### Fii no Alla Subori Jamaa Mun on

**9**<sup>1</sup> Mido wowlude goonga e nder humondiral an e \*Almasiihu on, mi fenataa, fondo  
an ngon no seeditorande lan \*Ruuhu Seniido on:<sup>2</sup> mido wondi e sokola tiidudo e  
muuseendi duumiindi ka 6ernde.<sup>3</sup> Ko fii mi yeloyto wonugol min tigi malkisaado,  
sendee e Almasiihu on fii musibbe an 6en, dun ko musidal an ngal ka yiyan,<sup>4</sup> 6en  
6e tawata ko \*Isra'iilayankeebe. Ko kambe Alla jogori wa 6ibbe. Ko 6en mangu  
ngun e \*ahadiji din e Sariya on e dewal ngal e fodaariiji din,<sup>5</sup> e maamankaaku  
Isra'iila'en ngun wonani. Awa kadi Almasiihu on ko yiyan mabbe, on Wondo Alla  
e dow kala huunde, mo mantoore wonani haa poomaa. Aamiina!

<sup>6</sup>Hinaa fii daaluyee Alla on ko meereejo. Ko fii hinaa jurriya Isra'iila ndin fow  
woni Isra'iilayanko.<sup>7</sup> Wonaa jurriya Ibraahiima on fow woni 6ibbe makko, kono  
no windii: «Ko e \*Issaaqa jurriya maa on nodditirtee.»<sup>8</sup> E maanaa, hinaa 6ibbe  
6en ka yiyan woni faybe Alla, kono ko 6ibbe fodaari ndin toddaa wonugol  
jurriya.<sup>9</sup> Awa e hino kongol fodaari ndin: «E oo saa'i tigi mi aray, Saarata heba  
6iddo.»<sup>k</sup>

<sup>10</sup> Ko 6eyditii e dun, Rifqatu siwti dido, 6e tawata ko oo maamiraawo men  
wi'eteedo Issaaqa woni ben mabbe.<sup>11-12</sup> Hay fewndo tawnoo faybe 6en hebaaka  
taho, sakko 6e wada ko boni maa ko moyyi, Alla daalanno Rifqatu wonde: «Ko  
mawdo on kurkanoytoo tosooko on»,<sup>m</sup> fii no ebboore Alla nden fii subagol

---

<sup>j</sup>9.7 Fud. 21.12

<sup>k</sup>9.9 Fud. 18.10

<sup>m</sup>9.12 Fud. 25.23

tabitira, dun non wonaa e kuudse maabbe den tippi, kono ko e kanko Alla, Noddoowo on,<sup>13</sup> wano no windori non: «Mi yidii Yaaquuba, mi ajii Iisu.»<sup>n</sup>

<sup>14</sup> Ko hondun wi'eten jooni? Hara angal peewal no e Alla? Pellet oo'o! <sup>15</sup> Ko fii himo daalani Muusaa wonde: «Mi yurmete on mo mi faalaa yurminde, mi moyyoo e on mo mi faalaa moyyaade e mun.»<sup>n16</sup> Ko dun wadi, dun hinaa immorde e faale neddanke, maa e wakkilaare makko, kono ko immorde e Alla, on Yurmeteedo. <sup>17</sup> Ko fii bindi din no wi'i Fir'awna: «Mi 6antii ma tun fii 6angingol bawgal an ngal e hoore maa, e fii no innde an nden lolliniree e hoore leydi ndin fow.»<sup>j</sup>

<sup>18</sup> Awa dun no holli wonde himo yurmina on mo o faalaa, o sattina bernde on mo o faalaa.

<sup>19</sup> Mido andi a wi'ay lan: «Bay ko nii, ko hondun Alla feliranta yimbe 6en? Ko fii ko hombo waawi dartaade faale makko on?»<sup>20</sup> An non taho, ko hombo wonu-maa ka yeddondiraa e Alla? E hara loonde wi'ay moyyindo nde on: «Ko hondun moyyinirandaa mi nii?»<sup>21</sup> E hara daaloyankeejo waawataa mahrigol loopal no o faaliraa woo, o moyyina ngal loopal gootal loode: wonde nden fii haaju hittudo, ndeya fii haajuhoy tosokoy?

<sup>22</sup> E si tawii, e nder ko Alla faalaa hollude tikkere mun nden e 6angingol bawgal makko ngal kon, o mujjanike den loode handunoode e tikkere makko nden e nder mujjal tiisungal, dun ko den ebbanooode fii hayrannde nden? <sup>23</sup> E si tawii non o faalaama andinde den loode de o yurmaa ngalu darja makko on, den de o ebbannoo fii darja makko on,<sup>24</sup> e maanaa dun ko enen be o noddi 6en, hinaa non tun e hakkunde Yahuudiyankeebe 6en, kono kadi e be wonaa Yahuudiyanke 6en?

<sup>25</sup> Wano o daaliri non ka deftere oo wi'eteedo Husaa'a:

<sup>n</sup>9.13 Mal. 1.2-3

<sup>n</sup>9.15 Egg. 33.19

<sup>j</sup>9.17 Egg. 9.16

«On mo wonaano jamaa an, mi nodday mo jamaa an,  
on mo wonaano kadi gido an, mi nodday mo gido an»,

<sup>26</sup>e: «Ka ɓe wi'anoo don tigi: 〈hinaa on jamaa an!〉  
ko don ɓe noddoytee ɓibbe Alla Wuurudo on.»<sup>p</sup>

<sup>27</sup>Isaaya\* kadi no wi'i fii Isra'iilayankeebe ɓen:  
«Nde adadu Isra'iilayankeebe ɓen duudiroyi wa njaareendi ndin ka baharu,  
ko heddiibe seedaabé tun dandetee,  
<sup>28</sup>ko fii Joomiraado on laatinay kongol naawoore mun nden ka hoore leydi no  
yaawiri haa timma!»<sup>q</sup>

<sup>29</sup>Wano Isaaya wiirunoo non:  
«Si tawno Joomiraado Jom Bawde on accanaano en jurriya,  
hanno en wa'iino wa dee ca'e didi, dun ko \*Saduumma e Amuura!»<sup>r</sup>

### Fii Angal Gomdinal Isra'iilayankeebe ɓen

<sup>30</sup>Ko hondun non wi'eten jooni? Be wonaa Yahuudiyanke, ɓe dabbataano  
peewal ngal ɓen, ɓe hebii peewal, ngal peewal iwrungal e gomdinal ngal.<sup>31</sup> E  
hin-le Isra'iilayankeebe, dabbaynoobe peewal iwrungal e Sariya on ɓen, ɓe  
laatinaano wadugol ko Sariya on yamiri kon fow.<sup>32</sup> Fii hondun? Ko fii  
Isra'iilayankeebe ɓen hinaa gomdinal dabbiraynood peewal ngal, kono ko wa si  
tawii ko kuude ɗen peewal heborta. Be bubi e hayre fegginaynde nden,<sup>33</sup> wano  
windori non:

«Mido tippinde ka hoore Fello \*Siyuuna hayre fegginaynde,  
e fetere libaynde.

Kala gomdindo e makko hersinoytaake.»<sup>s</sup>

<sup>p</sup>9.26 Hus. 2.1 e 2.25

<sup>q</sup>9.28 Isa. 10.22-23

<sup>r</sup>9.29 Isa. 1.9

**10**<sup>1</sup> Musibbe an, faale bernde an nden, e ko mi woni toraade Alla fii  
 \*Isra'ilayankeebe ben, ko yo be dande. <sup>2</sup>Kono mido seeditanaade be dundoo: hibe  
 himmani fii Alla, kono hinaa tippude e gandal. <sup>3</sup>Bay be andaali peewal iwrungal e  
 Alla ngal, e bay be dabbii no be tabintinira peewal mabbe ngal kambe tigi, be  
 ronki yankinanaade peewal Alla ngal. <sup>4</sup>Ko fii, ko \*Almasiihu on woni timmoode  
 Sariya on fii no kala gomdindo hebira peewal.

<sup>5</sup> Ko dun wadi, Muusaa no windi fii peewal iwrungal e Sariya on ngal, o wi'i:  
 «Kala doftiido dee yamirooje, o wuuiray de.»<sup>t6</sup> Kono e hino ko peewal iwrungal e  
 gomdinal ngal wi'i kon: «Wota a mijjo ka bernde maa: <ko hombo yawata ka  
 kammu?» (dun haray ko tippingol Almasiihu on), <sup>7</sup>«maa: <ko hombo tippotoo ka  
 \*gaygii ngii alaa kattudi ngin?» (dun haray ko suutugol Almasiihu on e  
 hakkunde maybe ben). <sup>8</sup>Awa ko hondun bindi din wi'i? Ko: «Daaluyee on no  
 takko maa, dun ko ka nder hunduko maa e ka bernde maa.»<sup>u</sup> On-le ko daaluyee  
 gomdinal ngal, on mo men woni yottinde <sup>9</sup>wonde: si a qirritorii hunduko maa  
 kon ko Iisaa woni Joomi on, e si a gomdinii ka bernde maa wonde Allaahu on  
 immintinii mo e hakkunde maybe ben, a dandete. <sup>10</sup>Ko fii ko bernde nden  
 gomdinirtee, ontigi jogoree wa feewudo, ko hunduko kon qirritortee, ontigi  
 dandee. <sup>11</sup>Wano bindi din wi'iri non: «Kala gomdindo e makko  
 hersinoytaake.»<sup>w12</sup> Awa, alaa ko sendindiri Yahuudiyanke e be wonaa  
 Yahuudiyanke, be fow ko Joomiraado gooto be mari, on Aldando kala jantiido mo.  
<sup>13</sup>Ko fii: «Onsay kala jantotoodo innde Joomiraado on dandoyte.»<sup>y</sup>

<sup>14</sup> Ko honno non be jantoroya innde on mo be gomdinaali? E ko honno be  
 gomdinirta on mo be nanaali fii mun no wowlee? E ko honno be nanirta fii makko

<sup>s</sup>9.33 Isa. 8.14 e 28.16<sup>t</sup>10.5 Lew. 18.5<sup>u</sup>10.6-8 Yan. 30.12-14<sup>w</sup>10.11 Isa. 28.16<sup>y</sup>10.13 Yul. 3.5

no wowlee e ɓaa wo waajotoodo? <sup>15</sup> E ko honno ɓe waajorta si ɓe imminaaka? Ko fii no windii: «Emba teppe yottinoobe Kibaaru Moyyô on no labaal!»<sup>y</sup>

<sup>16</sup> Kono hinaa fow doftii Kibaaru Moyyô on. Bay Isaaya wi'uno: «Joomiraado, ko hombo gomdini waaju amen ngun?»<sup>z17</sup> Ko dñun wadi, gomdinal ko e nanugol iwata, ko nanetee kon kadi ko e kongol Almasiihu on iwi. <sup>18</sup> Kono mi wi'i: hara ɓe nanaali? Oo'o:

«Hito kammuuli din yahii e leydi ndin fow,  
e kongudi majji din yottoyike haa ka kattudi leydi.»<sup>a</sup>

<sup>19</sup> Kono mi wi'i: e hara Isra'iilayankeebe ɓen faamaali dñun? Ko Muusaa adii wi'ude wonde Allaahu on daalii:

«Mi nawliniray on ɓe wonaa jamaa tigi,  
mi moninira on jamaa mo alaa faamu.»<sup>b</sup>

<sup>20</sup> Awa Isaaya hebuno cuucal haa o wi'i wonde Allaahu on daalii:

«Be alaa lan daabude ɓen hebii lan,  
mi feenani ɓe alaano landaade fii an ɓen.»<sup>c</sup>

<sup>21</sup> Kono e telen-ma Isra'iilayankeebe ɓen, o daali:

«Nallal ngal fow mido fontande juude an den jamaa murtudo yeddi.»<sup>d</sup>

### Seedee fii Allaahu on Bugitaaki Jamaa Isra'iila on

**11** <sup>1</sup> Awa mido landoo: e hara Alla bugitike jamaa mun on? Pellet oo'o! Ko fii min kadi ko mi \*Isra'iilayankeejo, jurriya Ibraahiima, ko mi jeyaado e oo bolondaa

\*Buniyamiinu. <sup>2</sup> Alla bugitaaki jamaa makko mo o andunoo ko adii fow. E on

<sup>y</sup>10.15 Isa. 52.7

<sup>z</sup>10.16 Isa. 53.1

<sup>a</sup>10.18 Zab. 19.5

<sup>b</sup>10.19 Yan. 32.21

<sup>c</sup>10.20 Isa. 65.1

<sup>d</sup>10.21 Isa. 65.2

andaa ko bindi din wi'i kon ka cortewol ka Iiliya wullitii e Alla don e hoore Isra'iilayankeebe 6en? <sup>3</sup>O wi'i: «Joomiraado, 6e warii annabaabe maa 6en, 6e waylitii layyorde maa den! Jooni ko min tun lutti, awa kadi hibe dabbä no 6e ittirammi e oo aduna!»<sup>d4</sup> Ko hondun woni jaabannde Alla nden? O daali: «Mido maritori yimbe guluuje njeediso, 6e suijanaali sanamuuru wi'eteendu \*Baalu ndun.»<sup>e5</sup> Ko wano non kadi e oo saa'i fewndiido, no woodi heddiibe 6e Alla subori sulfu mun on. <sup>6</sup>Si tawii non ko sulfu on o subori 6e, haray hinaa rewruude e kuude den hande kadi. Si hinaa dun, haray sulfu on wonaa sulfu. <sup>7</sup>Awa ko hondun? Ko Isra'iilayankeebe 6en dabbaynoo kon 6e hebaali, kono subaabé 6en hendike dun. 'Beya, berde mun den sattinaa, <sup>8</sup>wano windori non:

«Alla yedii 6e hakkillaaji daaniidi,  
e gite de yi'ataa,  
e noppi di nanataa,  
haa weetaango hande ngoo.»<sup>f</sup>

<sup>9</sup>Daawuuda kadi wi'i:

«Yo ndaddule ka 6e jaamata don  
wonan 6e pircol e ngantan,  
e peggal e njoddi kuude!

<sup>10</sup>Yo gite mabbe den nibbitu haa tawa 6e yi'ataa,  
e yobe laato saa'i kala turiibe!»<sup>g</sup>

### Misal Yettaangal e Caldì Tokkaadi

<sup>11</sup>Awa mido landoo: Bay 6e feggiye, 6e yanuno, ngal 6e immotaako? Pellet oo'o!  
Kono ko sabu bonnere mabbe nden kisiyee on yediraa 6e wonaa Yahuudiyanke

<sup>d</sup>11.3 1Lam. 19.10

<sup>e</sup>11.4 1Lam 19.18

<sup>f</sup>11.8 Yaj. 29.3 e Isa. 29.10

<sup>g</sup>11.10 Zab. 69.23-24

ben fii memmingol nawliigu Isra'iilayankeebe 6en.<sup>12</sup> E hin-le, si tawii bonnere mabbe nden ko ngalu oo aduna, e si tawii fadannde mabbe nden ko ngalu be wonaa Yahuudiyanke 6en, haray ko ittiri ngalu hongu beydotoo ka tawdegol mabbe e kisiyee on.<sup>13</sup> Awa mi andinii on, onon be wonaa Yahuudiyanke 6en, min oo \*sahaabaajo fii be wonaa Yahuudiyanke 6en, min mido teddini fii golle an den,<sup>14</sup> fii, si tawii no gasa, memmingol nawliigu e hakkunde lejol an ngol, e dandugol wobbe 6en.<sup>15</sup> Si tawii wadeede mabbe sera addii moyyintingol hakkunde aduna on e Alla, ko hondun artireede mabbe nden wonoyta si hinaa immintineede ka mayde?<sup>16</sup> E hin-le, si tawii bireedijje arane den ko Alla wonani, haray farin piyaado on men. Si tawii kadi dadol ngol ko Alla wonani, haray caldi din men.

<sup>17</sup> Si tawii non godsi e caldi din saltaama, e an non, ki \*zaytuunihi buruurehi, a tokkaama batte majji, haa tawii a tawdaama e dadol ngol e endan zaytuuni dan,<sup>18</sup> wota a mantor caldi din. Si tawii a mantoray, andu tun wonde hinaa an jogii dadol ngol, kono ko dadol ngol jogi-maa.

<sup>19</sup> Haray ko wi'ataa: «Caldi saltaama fii min yo mi tokke.»<sup>20</sup> Andaa fota wonde ko di tayiraa ko angal gomfinal majji on. An, a sijorii don sabu gomfinal maa ngal. Awa wota a mawnintino, kono hulu.<sup>21</sup> Ko fii, si Allaahu on accaali caldi ko ngal wondunoo kon, an kadi o accataa ma.

<sup>22</sup> Awa anditu fii moyyere Alla nden e yagginannde makko nden, yagginannde makko nden e hoore yanube 6en, e moyyere Alla nden e hoore maa, si a duumike e nder nden moyyere. Si hinaa dñun, an kadi, a soppete.<sup>23</sup> Kambe kadi wano non. Si be duumaaki e angal gomfinal ngal, be tokkete, ko fii Alla no mari bawgal tokkugol be kadi.<sup>24</sup> Si tawii an a soppaama e zaytuunihi buruurehi, a tokkaama e zaytuunihi tutaaki, woopondirki e mbaadi maa ndin, ittii e sikke si kambe be tokkete e mbaadi mabbe ndin, e zaytuunihi mabbe kin tigi.

### Fii no Jamaa Isra'iilayanko on fow Dandirtee

<sup>25</sup> Ko fii, yo musibbe an, mi yidaa yo on ronku andude oo gundoo doo fii wota on sikku hidon mari faamu feyítungu: sattere bernde no e hoore wobbe e jamaa Isra'iilayankeebe ben haa yero ko timmi e be wonaa Yahuudiyanke ben naata.

<sup>26</sup> Ontuma non Isra'iilayanko fow wonay dandaabe, wano windori non:

«Jattinoowo on iwray \*Siyuuna,  
o pottina e bolondaa Yaaquuba on kala ko yaadaa e faale Alla on.

<sup>27</sup> Ko dun wonoyta \*ahadi an ndin hakkunde an e mabbe  
nde mi booroyi junuubaaji mabbe din.»<sup>h</sup>

<sup>28</sup> E telen-ma Kibaaru Moyyo on, ko be aybe sabu mon, kono e telen-ma subeede nden, ko be yibbe Allaahu on sabu baabiraabe mabbe ben. <sup>29</sup> Ko fii, dokke Alla den e noddaandu makko ndun hinaa ko jabitotoo. <sup>30</sup> Hari on doftanooki Alla, kono jooni on hebirii yurmeende sabu angal doftaare Yahuudiyankebe ben. <sup>31</sup> Ko wano non jooni, kambe kadi be wontiri be doftotaako Alla fii no be hebiroya yurmeende nden kambe kadi, sabu yurmeende nde wadanadon nden. <sup>32</sup> Ko fii Alla dumbii yimbe ben fow e nder geddi fii no o yurmiree fow.

### Mantoore fii Alla

<sup>33</sup> Ko haa honto ngalu Alla ngun  
e faamu makko ngun e gandal makko ngal luggi!  
Hay gooto waawataa sifaade jaawooje makko den,  
hay gooto waawataa andude ebbooje makko den!

<sup>34</sup> Ko fii ko hombo andi mijo Joomiraado on,  
maa ko hombo woni waajotoodo mo on,

<sup>35</sup> ko hombo adii mo okkorde, si o yobita mo?

<sup>36</sup> Ko fii fow ko immorde e makko,

---

<sup>h</sup>11.26-27 Isa. 59.20-21, 27.9 e Yer. 31.33-34

tippude e makko, e fii makko.

Ko kanko mangu wonani haa poomaa. Aamiina!

### Fii Sadaka Wuurudo

**12**<sup>1</sup> Awa mi wakkilinii on, yo musibbe an, sabu yurmeende Alla nden, okkitirgol balli mon din wa sadaka wurdo laabudo, weloowo mo, ko dun wonanoyta on dewal haanungal. <sup>2</sup> Wota on nembu aduna fewndiido on, kono wonee waylaabe, be hakkillaaji mun heydintinaa, fii no andiron ko hondun woni faale Alla on: dun ko ko moyyi kon e ko welata mo kon e ko timmi kon.

<sup>3</sup> Tippude e moyyere nde o yedimmi nden, mi wi'ay kala e mon wota o mijo himo hitti haa feyyiti, kono yo o mijito fii hoore makko wano haaniri non, mo kala embere gomfinal ngal Alla yedi dun ngal. <sup>4</sup> Wano tawiri non hidēn mari tere buy e nder bandu wooturu, awa kadi tere den fow hinaa golle goote mari, <sup>5</sup> dun non, fii kala hidēn duudi, en fow ko en bandu wooturu e nder humondiral e \*Almasiihu on, en fow ko en tere jogondirde. <sup>6</sup> Kono hidēn mari dokke seedude, wano Alla yediri mo kala e men moyyere non. Si tawii ko dokkal haalugol ko Alla longini dun, yo taw ko ko yaadi e gomfinal. <sup>7</sup> Si ko dokkal fii wallugol, yo o wallu, si ko dokkal jannugol, yo o jannu. <sup>8</sup> Mo no mari kadi dokkal wakkilingol, yo o wakkilin. On mardo kadi dokkal okkugol, yo o okkir no yaajiri. On mardo dokkal ardagol kadi, yo o ardor no keldiri. On mardo dokkal yurmeende kadi, yo o wadir dun weltaare.

### Fii Giggol Sellungol ngol

<sup>9</sup> Yo giggol ngol wonu sellungol. Ajon ko boni kon, humodon no tiidiri e ko moyyi kon. <sup>10</sup> Yidindiron giggol siddankaaku, mo kala e mon jogitora oya wa burdo dun teddude. <sup>11</sup> Wakkilon don hara on aamaali, kurkoranon Joomiraado on berde mon den fow. <sup>12</sup> Weltee e hoore tanyinagol, ηajanodon tampereeji din,

duumodon e toraare Alla.<sup>13</sup> Faaboron gomdinþe þen ko þe handi kon, newanodon wernugol.

<sup>14</sup> Du'anodon cukkotooþe on þen, du'ee, wota on hudu. <sup>15</sup> Weltodee e þen wonþe weltaade, wullidon e wonþe wullude þen. <sup>16</sup> Mijondiranee miijo wooto, wota on mawnintino, kono jabon jippinde hoore mon. Wota on wadu hoore mon faamube.

<sup>17</sup> Wota on yobitir gooto bone bone. Wadee ko yimþe þen fow ndaarata tawa no moyýi. <sup>18</sup> Si tawii no gasa, yeru hidon waawi, wondee e yimþe þen fow e nder buttu. <sup>19</sup> Wota on yottano hoore mon onon tigi, yo yidaabe an, kono accee tikkere Alla nden yottoo, ko fii no windii: «Joomiraado on wi'i: Ko min yottannde wonani, ko min woni Yoboowo.»<sup>20</sup> Ko fii no windii kadi:

«Si gano maa no weelaa, okkor mo, o jaama,  
si himo dondaa, okkor mo, o yara.

Ko fii warrugol non,  
haray no wa'i wa si ko yulþe yiite moobudaa ka hoore makko.»<sup>j</sup>

<sup>21</sup> Wota bone foolu on, kono fooliree bone on moyýere.

### Fii Yankinanagol Laamu ngun

**13** <sup>1</sup> Yo kala neddo yankinano laamuji din, ko fii alaa laamu ngu tawata hinaa e Alla iwri, ko fii laamuji woodudi din, ko Alla joddini di. <sup>2</sup> Ko dun wadi, kala on dartiido laamu ngun, haray dartike yamiroore Alla nden, þen dartiibe non, haray fawii hoore mun jaawoore. <sup>3</sup> Laamiibe þen hulbinaaki si tawii ko ko moyýi wonaa wadeede, kono ko si tawii ko ko boni. Si a faalaaka hulude laamu ngun, wadu ko moyýi, dun a hebay kuluujaa maggu on. <sup>4</sup> Ko fii ko kangu woni kurkaadu Alla fii nafa maa kan. Kono si hisa wadude ko boni, haray wonu e nder kulol, þay hinaa meere ngu jogori kaafa, ko fii ko kangu woni kurkaadu Alla fii yottingol tikkere

---

<sup>i</sup>12.19 Yaj. 32.35

<sup>j</sup>12.20 Tin. 25.21-22

makko nden e hoore on wadoowo ko boni.<sup>5</sup> Awa jaka yankinanagol laamu ngun no hitti, hinaa fii nden tikkere tun non, kono kadi ko sabu bernde ontigi nden.

<sup>6</sup>Ko sabu dun kadi hidon yoba sagalle, ko fii laamiibe ben ko liggantoofe Alla, duumiibe e wadugol den golle no moyyiri.<sup>7</sup> Jonnitee mo kala ko handi kon, jonniton sagalle den on mo haanudon jonnude, hulon on mo haanudon hulude, teddinon on mo haanudon teddinde.

### Fii Yidindirgol

<sup>8</sup>Wota jnamaande woo wonu hakkunde mon e godđo si wonaa yidindirgol, ko fii kala yidudo wondibbe mun ben, haray timminii Sariya on.<sup>9</sup> Ko fii yamirooje den, dun ko «wota mo jeena», «wota mo itta hoore», «wota mo wujja», «wota mo seeditoo fenaande», «wota mo himmana ko godđo jeyi», e deya yamirooje fow<sup>k</sup> no noggaa e nder ngol daalol doo: «Yo a yidir nokondo maa on wano yidirdaa hoore maa non.»<sup>m10</sup> Giggol wadataa nokondo mun ko boni, awa jaka ko giggol woni timmoode Sariya on.

<sup>11</sup>Bay hidon andi ko e saa'i hombo wonderen, awa immee, hinaa saa'i daanagol nii! Ko fii jooni kisiyee on burtii en battaade edii fewndo arden e gomfinde.

<sup>12</sup>Jemma on muutike, ɓadike weetude, awa bortoden kuude niwre nden, bornoden aalaaji ndaygu ngun.<sup>13</sup> Wuuriren no feewiri, wa tumbere nalorma, e ɓaawo \*fasaadu e mandilugol e jinaa e jiibaare e yeddondiral e nawliigu.<sup>14</sup> Kono bornodon Iisaa Almasiihu Joomi men on, hara on dabbaali mbeleede ɓandu fii weltingol himmeeji.

---

<sup>k</sup>13.9a Egg. 20.13-17

<sup>m</sup>13.9b Lew. 19.18

## Fii Hakkunde Tiidube e be Tiidaa Gomdinal ben

14

<sup>1</sup>Jabee on mo tiidaa gomdinal e baawo feloore. <sup>2</sup>Goddo on no sikka no waawi jaamude ko woni woo, oya mo tiidaa gomdinal kadi ko bïbïe naakoo tun jaamata. <sup>3</sup>On jaamoowo ko woni woo, wota jiddin few mo jaamataa ko woni woo on. On mo jaamataa kadi, wota felu jaamoowo on, ko fii Alla no jabi mo kala. <sup>4</sup>Ko hombo wonu-maa an, oo feloowo kurkaadu goddo goo? Si tawii himo darii maa si himo yani, dun ko jeydo mo on wonani. Kono o daroto, ko fii Joomiraado on no mari bawgal tambitagol mo.

<sup>5</sup>Wobbe no wi'i wonde jalaade den no burdi, wobbe ben no jogitii de fow hide fota. Awa yo mo kala hoolor ko miijii kon. <sup>6</sup>On mo burdindini jalaade den, haray ko fii teddingol Joomiraado on o wadiri dun. On mo no jaama kadi, haray ko fii teddingol Joomiraado on o woni jaamande, ko fii himo jarnude Alla. On mo alaa jaamude, haray ko fii teddingol Joomiraado on hadi o jaama, ko fii kanko kadi himo jarnude Alla. <sup>7</sup>Ko dun wadi, hay gooto e men alaa wuurande hoore mun tigi, e hay gooto alaa maayande hoore mun tigi. <sup>8</sup>Ko fii si en wuuru, haray ko Joomiraado on wuuranden, si en maayu, haray ko Joomiraado on maayanden. Woni en wuuru maa en maayu, ko Joomiraado on jeyi en. <sup>9</sup>Ko dun wadi si \*Almasiihu on maayi, o immitii, fii wonugol Jom maybe ben e wurbe ben. <sup>10</sup>Kono an, ko hondun felantaa musiddo maa on? Maa an, ko hondun jiddinantaa musiddo maa on? Ko fii en fow en daroyto yeeso naawoore Alla nden. <sup>11</sup>Ko fii no windii wonde, Joomiraado on no daali:

«Fodde ko goonga mido wuuri,  
kala howru jiccoto yeeso an,  
kala denngal mantay Alla.»<sup>n</sup>

---

<sup>n</sup>14.11 Isa. 45.23

<sup>12</sup>Ko dun wadî, mo kala e men qirritoto yeeso Alla fii hoore mun tigi. <sup>13</sup>Awa, wota en jaawindir hande kadi, dun-le wuren ardinee hakkil, fii wota on wadu yeeso musiddo mon on hayre fegginaynde maa wonon sabu yanal. <sup>14</sup>Mido andi, mido felliti e nder humondiral an ngal e Iisaa Joomi on, huunde alaa ko tuunani hoore mun, kono si goddo no mijiji wonde godsun laabaa, haray dun laabanaa mo. <sup>15</sup>Si tawii musiddo maa aanii sabu ko jaamataa kon, haray a woniraa giggol hande kadi. Wota ko jaamataa kon wonu sabu hayrannde on mo Almasiihu on maayi fii mun. <sup>16</sup>Wota ko moyyani on kon wowlire wa ko boni. <sup>17</sup>Ko fii \*laamu Alla ngun hinaa jaametee maa njaram, kono ko peewal e buttu e weltaare ko \*Ruuhu Seniido on yedata kon. <sup>18</sup>On mo kurkorani nii Almasiihu on, haray no wela Alla, no mari kadi teddungal yimbe ben.

<sup>19</sup>Awa dabben ko beydata buttu e ko tiidinta hakkundeeji men e nder gomdinal ngal. <sup>20</sup>Wota a bonnir golle Alla den jaametee. Ka haqiiqa, jaameteeji din fow no laabi, kono moyyanaa neddo ka o jaama godsun ko wonata sabu feggingol goddo. <sup>21</sup>No moyyani goddo hara o jaamaali teewu, o yaraali njaram mandilinaydan, maa wadugol kala ko fegginta musiddo mun. <sup>22</sup>Ngal gomdinal ngal mardaa, maru ngal fii maa yeeso Alla. Maloore wonanii on mo fawaali hoore mun jaawoore e nder anniyeji mun. <sup>23</sup>Kono on jaamudo ko sikkitii, haray fawtike jaawoore, ko fii dun hinaa e gomdinal ngal iwri. Ko fii kala ko iwraa e gomdinal ngal, haray ko junuubu.

**15** <sup>1</sup>Enen tiidube e gomdinal ben, hidén haani tambitaade lo'ereeji ben be tiidaa ka gomdinal, e wota en dabbu ko welata en kon. <sup>2</sup>Yo mo kala e men weltinir nokondo mun on ko moyyí fii tiidingol mo ka gomdinal. <sup>3</sup>Ko fii \*Almasiihu on dabbâano ko welata mo kon, kono wano bindi din holliri non: «Hoyreeji wonbe ma hoynude ben yanii e hoore an.»<sup>n4</sup> E hin-le ko adanoo windeede kon fow

---

<sup>n</sup>15.3 Zab. 69.9

wonanii en jannde, fii no hebiren tama'u on sabu ɳajnaare nden e wakkilaare iwrunde e bindi din.

<sup>5</sup> Yo Alla, Jom ɳajnaare nden e Jom wakkilaare nden, yedu on wonugol mijo wooto, e nder jokkugol misal Iisaa Almasiihu on, <sup>6</sup> fii no mawniniron Alla, on Ben Iisaa Almasiihu Joomi men on, e nder nanondiral e kongol gootol.

<sup>7</sup> Jabbondiree no moyýíri, wano Almasiihu on jabbori on non, fii mangu Alla ngun. <sup>8</sup> Ko mi woni wi'ude, ko Almasiihu on wonii kurkaadu Yahuudiyankeebé ben fii bængingol goonga Alla on, e nder haqinqingol fodaariiji wadanaadi baabiraabe ben, <sup>9</sup> fii no ɓe wonaa Yahuudiyanke ben mawninira Alla fii yurmeende makko nden, wano windori ka Zabuura non:

«Mi mantete e hakkunde leyýí din,  
mi beyta fii teddingol innde maa nden.»<sup>ŋ</sup>

<sup>10</sup> No windii ton kadi:

«Ko onon, yo leyýí, weltodee e jamaa makko on!»<sup>p</sup>

<sup>11</sup> No windii ton kadi fahin:

«Onon leyýí din fow, jarnee Joomiraado on,  
awa kadi yo jamaaji din fow mantu mo!»<sup>q</sup>

<sup>12</sup> Isaaya kadi no wi'i:

«Geeyol Yassaa'u ngol feejoyay,  
ko ngol immoytoo fii ardagol leyýí din,  
leyýí din tanyinora ngol.»<sup>r</sup>

<sup>13</sup> Yo Alla, Jom tama'u on, hebbin on weltaare e buttu fow e nder gomdinal ngal, fii no heewiron tanyinaare immorde e bawgal \*Ruuhu Seniido on.

<sup>ŋ</sup>15.9 2Sam. 22.50 e Zab. 18.50

<sup>p</sup>15.10 Yan. 32.43

<sup>q</sup>15.11 Zab. 117. 1

<sup>r</sup>15.12 Ko Yassaa'u woni ben Daawuuda. Isa. 11.10

**Fii Golle Puulusa den**

<sup>14</sup> E telen-ma mon, yo musibbe an, min tigi mido felliti hidon heewi moyyere e faamu timmungu, e hidon waawi waajondirde. <sup>15</sup> Ko dun wadi, e nooneeji goo mi windiranii on cuucal, fii andintingol on tobbe goo de jangunodon, sabu moyyere nde Alla wadanimmu nden <sup>16</sup>wonangol Iisaa Almasiihu on kurkaadu fii be wonaa Yahuudiyanke ben, e nder ko Alla toddii mi kon fii Kibaaru Moyyo makko on, fii no be wonaa Yahuudiyanke ben wonirana mo sadaka weloowo mo, labbiniraado\* Ruuhu Senido on.

<sup>17</sup> Sabu humondiral an e Iisaa Almasiihu on, mido waawi mantorde golle de mi woni gollande Alla den. <sup>18</sup> Ko fii mi suusataa wowlude si wonaa ko Almasiihu on wadiri e an kon fii addugol be wonaa Yahuudiyanke ben doftorgol Alla kongol e kuugal, <sup>19</sup>tippude e doole maandeeji e kaawakeeji moyyi e bawgal Ruuhu Alla on. Ko wano non, gila \*Yerusalaam mi taarori non haa hewti Iliriya, mi yottini Kibaaru Moyyo Almasiihu on fow. <sup>20</sup>Awa anniye an on ko fejnningol Kibaaru Moyyo on nokku ka tawata Almasiihu on andaaka, fii wota mi darnu e hoore didol goddo. <sup>21</sup>Kono wano windori non:

«Ben be fejjinanananooka yi'oyay,  
e ben be nanaano kadi faamoyay.»<sup>s</sup>

<sup>22</sup>Ko dun wonnoo mi hadude soono woo yahugol ka mon.

**Ebooje Puulusa den fii Yahugol Roomu**

<sup>23</sup> Kono jooni mi gaynii golle an den e dii nokkeeli. Gila duubi buy mido faalanoo yahude ka mon. <sup>24</sup>Nde mido yaha Espaani, mido tanyinii yiidugol e mon e nder ko mi rewata don kon, mi weltora wondugol e mon seeda. Onsay, wallon mi no yahugol e ndin leydi neworanammi. <sup>25</sup>Fewndo doo mido yahude Yerusalaam fii kurkanagol yimbe Alla ben. <sup>26</sup>Ko fii be Masedonii ben e be Akaaya ben no faalaa

---

<sup>s</sup>15.21 Isa. 52.15

moobindirde godsdun e nder jawle maabbe den fii miskinbe wonbe e hakkunde yimbe Alla ben Yerusalem.<sup>27</sup> Awa, hibe weltori wadugol dun, bay hibe haani be wadande. Ko fii, si be wonaa Yahuudiyanke ben hebirii barkiji Alla din sabu Yahuudiyankeeben, kambe be wonaa Yahuudiyanke ben kadi hibe haani be wallirde keyeeji aduna.<sup>28</sup> Si mi gaynii jonnude ko moobindiraa kon haanube hendaade ben, mi rewoyay ka mon, nde mido yaha Espaani.<sup>29</sup> Mido andi, nde mido yaha ka mon, mi yaaday e barki timmuki Almasiihu on.

<sup>30</sup> Mi wakkilinii on sabu Iisaa Almasiihu Joomi men on yo musibbe an, e sabu giggol Ruuhu Alla on, dartodugol e an e nder fewtingol Alla toraaje fii an,<sup>31</sup> fii no mi hettora e juude yeddube wonbe ka diwal \*Yahuuda ben, e fii no gomdinbe ben jabira dokke, de mi nabata Yerusalem den, no moyyiri.<sup>32</sup> Dun, mi hewtiday ka mon e weltaare, si tawii ko dun woni faale Alla on, hara en fow en heydintinoday.<sup>33</sup> Yo Alla Jom buttu on wondu e mon on fow. Aamiina!

### Fii Salminande den ka Rawnoode

**16**<sup>1</sup> Mi halfinii on oo bandiraawo men wi'eteedo Fibii, wallitotoodo ka \*moftal wongal Kenkere,<sup>2</sup> fii no jabboron mo e innde Joomiraado on, e noone no haanirani gomdinbe ben. Wattitodon e juude makko fii kala huunde nde haaju makko yanoyi e mon, ko fii o wallitike duudube, min kadi men o wallitike lan.

<sup>3</sup> Hiwranee lan Piriskiila e Akiila, ben wondibbe an e golle e nder humondiral e Iisaa Almasiihu on,<sup>4</sup> ben weebitube ngurndan mun fii hiwugol ngurndan an dan. Hinaa min tun non weltanii be, kono ko mofte be wonaa Yahuudiyanke ben fow kadi.<sup>5</sup> Salminanee lan kadi moftal wongal ka suudu maabbe ngal. Salminanon mi kadi oo gido an wi'eteedo Apayniiti, on adiido gomdinde \*Almasiihu on e hakkunde be \*Aazii ben.<sup>6</sup> Salminanon mi Mariyama, on gollannoodo on fota.

<sup>7</sup> Salminanon mi kadi Andoroniiki e Yunyaasi, dun ko bee musibbe an e wondibbe an ka kasoo, dun ko ben be \*sahaabaabe ben hoolii fota, adiibe lan jeyeede e

Almasiihu on.<sup>8</sup> Salminanon mi kadi Ampiliyaasi, on gido an e nder humondiral e Joomiraado on.<sup>9</sup> Salminanon mi kadi Urbaanu, dun ko oo wondiddo men e golle e nder humondiral e Almasiihu on, e oo gido an wi'eteedo Astakiisi.<sup>10</sup> Salminanon mi kadi Apeliisi, on mo gomdinal mun e Almasiihu on seeditaa fii mun.

Salminanon mi bee jeyaabe e nduu suudu oo wi'eteedo Aristobuulu.

<sup>11</sup> Salminanon mi oo musiddo an wi'eteedo Herodiyuuna.

Salminanon mi kadi bee jeyaabe e nduu suudu oo wi'eteedo Narkiisu, humondirbe e Joomiraado on.<sup>12</sup> Salminanon mi kadi Tarifayna e Tarifuusa, dun ko bee rewbe gollanoobe Joomiraado on. Salminanon mi kadi Persiisa, gido an on, on kadi gollanii Joomiraado on fota.<sup>13</sup> Salminanon mi kadi Rufuusa, oo subaado Joomiraado on. Salminanon mi kadi yumma makko, on mo tawata kadi ko yumma an.<sup>14</sup> Salminanon mi kadi Asinkiriiti e Filiguuna e Hermiisi e Patrobaasi e Hermasa e musibbe wondube e mabbe ben fow.<sup>15</sup> Salminanon mi kadi Filolooge e Yuliya e Niriyuusa, wondude e bandiraawo makko on, e Olimpaasi e wondibbe mabbe gomdinbe ben fow.<sup>16</sup> Salmondiree, hirbondiron hirbondiral laabungal. Mofte\* Almasiihu on den fow salminii on.

<sup>17</sup> Mi wakkilinii on, yo musibbe an, e reenagol ko wonata sabu sendondire e pegge ko luutondiri e jannde nde hendidon nden. Wodditee ben wonaybe sabu dun.<sup>18</sup> Ko fii sifa ben yimbe kurkantaako Almasiihu on, on Joomi men, kono ko deedi mabbe din tun be kurkantoo. Be faljinira berde ben be bonnaa, kongudi maabbe weldi e waccooje.<sup>19</sup> Onon non, doftaare mon nden ko nde yimbe ben fow andi. Awa mido weltori fii mon on, e mido yidi yo on wonu faamube e telen-ma ko moyyi kon, e daybe e telen-ma ko boni kon.<sup>20</sup> Alla Jom buttu on muncay Ibuliisa ka ley koyde mon ko neebaa. Yo moyyere Iisaa Joomi men on wonu e mon.<sup>21</sup> Timotee, oo wondiddo an e golle, salminii on, wondude e Lukiyuusi e Yaasuunu e Sosipaate, bee musibbe an.<sup>22</sup> E innde Joomiraado on, min oo

wi'eteedo Tertiyuusi, mi salminii on, dun ko min oo windudo nduu batakuru.

<sup>23</sup> Gayuusi wernudo lan on, werni moftal ngal fow kadi, salminii on.

Arastuusa kadi, dun ko halfinaado jawdi saare nden, salminii on, wondude e oo musiddo wi'eteedo Kawartuusu.

<sup>24</sup> Yo moyére Iisaa Almasiihu Joomi men on wonu e mon on fow. Aamiina!

### **Jaaroore Rawnorde nden**

<sup>25</sup> Mangu wonanii Alla, on Waawudo tabintinde on, immorde e Kibaaru Moyýo an on e waajuuji fii Iisaa Almasiihu on, ko yaadi e fejnjinannde gundoo suudinoodo on gila ka fuddoode saa'iiji din, <sup>26</sup> kono o fejnjiniraama jooni defte annabaabe ñen, wano Alla poomayankeejo on yamiri non, o fejnjinanaama leyýi din fow fii yo ñe gomdin mo, ñe doftoo mo.

<sup>27</sup> Mangu wonanii on Alla Bajjo, Jom Faamu, immorde e Iisaa Almasiihu on haa poomaa. Aamiina!

---

### **ÉPÎTRE DE PAUL AUX ROMAINS**

en Langue Pular (Fouta-Jalon)

*République de Guinée*

© 2013 Traducteurs Pionniers de la Bible

en collaboration avec

Mission Protestante Réformée